




السيرة الذاتية

الاسم : محمد حسن رشاد

اسم الشهرة : (ببلاوي)

السن : ٢٠ سنة

طالب هندسة

عمري ما تخيلت أنني أكون عضو في ديوان ، بس بجد
في ناس كثير ساعدتني عشان أبقي كده ..
فأحب أشكر :

- الشاعر محمد عبدالله حمودة

- نور أيمن

- منى أحمد (ميثة)

وطبعا كل أصحابي في الكلية وخارج الكلية ، اللي لو
كتبتهم واحد واحد مش هيكفيهم كتاب واحد .

وطبعا أمي وأبوي وأخويا ، وده مش كلام روتيني ولا
حاجة لكن بجد مهما شكرتهم مش هيكفي .

وإهداء خاص لروح صاحبي / محمد جمال الله يرحمه .

للتواصل :

facebook.com/beblawy.uwk

محمد حسن (ببلوى)

الـخوف

(١)

الـخوف م الجاي و المتداري
بيقلل عمرك اجباري
و تعيش اليوم زي امبارح
فسيناريو القلق التكراري
الـخوف و خصوصا من بكرة
بيموت فالعقل الفكرة
ويمرر فنجان الدنيا
و بدل ما تحب بتكره

(٢)

قدرك مكتوب م الاول
عمر الـخوف ما كان بيطول
فالعيشة و فالاعمار
لكن بالعكس يقلل
عيش فحياتك مبسوط
متخافش م الظروف
من خاف جدا م الموت
هيموت فعلا م الـخوف

(٣)

الخوف من انك تغلط
ده لوحده اساس الغلطة
حاول مرة و اتنين
يمكن تنجح فالتالثة
ما الانسان خطاء بطبيعته
كام غالي فحياتك بعته
علشان خايف انه يروح
و فلحظة خوفك ضيعته

(٤)

الخوف مالناس و كلامهم
بيقل حجمك بينهم
هتعيش عمرك بتخاف
لتشوف نفسك فعيونهم
سبيك مالناس بحياتهم
حكاياتك غير حكايتهم
لو حبيت ترسم صورتك
او عي تبص ف مراياتهم

(٥)

لو سحب البحر جامد
عمره ما هيشدك
فامسح حدود اللوحة
و ارسما علي قدك
اثبت فوش الصعب
و عافر معاه
واياك فيوم تنكسر
و ايديك علي خدك
لو خفت يوم مالريح
هواه هيطيرك
وان خفت يوم مالازاز
مسيره هيعورك
اياك تسمح لنفسك
تخلي شئ يكسرك
و ادخل جوا نفسك
آمن بس بجوهرك

بعدت ليه ؟!

الدمع عشش فالعيون
و الحزن كسر فالضلوع
بعدت ليه ؟!
و كسرت سور سجن الدموع
و بنيت بطوبه سور بينا و بينك !
مكسوف منك يا صاحبي مش عارف ادعيلك
انا نور ايماني انطفي
كان نفسي اصليلك

فاكر زمان ؟
كنا سوا
فاردين جناحتنا فالهوا
ليه نزلت عالارض و جريت ؟
و سبتنا من غير جناح
كان لسة بدري ليه مشيت ؟
بدلت ليه الضحك بجراح
فاكر ايام لمتنا ؟
كانت بتعدي ساعات فتواني
ليه مشيت و معاك ضحكنا ؟

طب ليه مش هنشوفك تاني ؟
طب ليه الدنيا بعدتنا ؟
و سابت الدمعة ملازمانى
طب ليه فضلت الموت علينا ؟
طب ليه مشيت و سبت ايدينا ؟
طب ليه مستحملتش حبة ؟
كنا لحقنا و اتلمينا
ساعة الفراق مش بس لحظة ما بين اتنين احبة
ساعة الفراق كل عقارب الساعات بتلدغ نفسها
و توقف كل الازمنة
مقدرتش تستحمل حبة باي طريقة ممكنة ؟
ده فيوم فراقك ..
حزنت جدر الارض مرضتش تطلع و اختفت
و الشمس زعلت عليك فجأة انطفت
حتي السما
حتي السما من جرحها نزفت شتا
بعدت ليه ؟ !!
وسبت روحك ميتة !

مس الوجد

كل القصايد بتصير مرتجع
لما القلم سنه يرعش عالسطور
قلبي الحزين مسه الوجد
فشلت معاه كل الطرق حتي البخور
والعقل حار فالاختيار
يا اما جنة يا اما نار
و القلب مل الانتظار
و الشمس صارت تغرب
من نص النهار
حتي الجبال صابها الكسور
قالولي اصبر صبرت فمل مني الصبر
شغلت نفسي بالكتابة فساح فايدي الحبر
جربت اطلع لفوق فوقعت تحت الصفر
درويش سكنت فالبارات
نفخت الحزن فالدخان
مزيكتي طرقة الكاسات
مليتها بدمعة الحرمان
شربت كاس الخمر
لقيت الخمرة كارهاني

رميت همومي بجمر
لقيت الجمرة حارقاني
جربت اروح للنوم
صحيت والدمعة قهراني
دخل عليا الشتا
و القلب بردان مع وحدته
لقا اللي تكونله غطا
شدت غطاه و ذلته
غرقان فبحر الهوي
ما لقيت فيوم نجدة
صليت فقلبي ارتوي
وارتحت من سجدة
مكتوف الايديين و شايف
احلامي مقتولة
بمشي و برجع مكاني
اتاريني فدائرة مقفولة..

كل اللي مات اتخدع

كل الاماكن وجع
كل الكلام احزان
كل اللي مات اتخدع
ده لانه مات متخان
كل اللي مات كان جدع
ده فعز ما بيتوجع
كان عالبلد قلقان
كل اللي مات اتخدع
دع لانه مات متخان
والحزن نبت و اتزرع
حتي العلم زعلان
اعلن يا عم الحداد
نكس خ لاص العلم
اللي بيحمينا مات
اصبح مكانه العدم
كل الاكاذيب اتصدقت
بالسمع
كل الجموع اتفرقت
مالجمع

يا ام الشهيد عيطي
و متمسحيش الدمع
عشان محدش هياخد حق
اللي مات متهان
كل اللي مات اتخدع
ده لانه مات متخان
ياللي انت روحك فوق
ابكي علي حالك
عقبال ما بلدك تفوق
شوف كام شهيد جالك
كل اللي مات مهو مات
حتي الحقوق ماتوا
كل اللي عاش اموات
مستني نهاياته
كل القلوب قاسية
كل العيون جافة
كل المراكب ماشية
واحنا علي الحفة!
كل العقول وقفت
و الرك عالنية!
لو مات شهيد اليوم
عادي!!

بكرة يموت مية !
اشمت يا ابو قلب حجر
خليك كده شمتان
كل اللي راح
راح هدر
ده لانه شعب جبان !

فلاش باك

كل ما سنك يبدأ يكبر
كل ما عقلك يسرح اكثر
لحياتك من كام سنة فاتوا
للماضي بقصصه و حكاياته
و الفرحة بالعيد والكحك
و لكام ذكرى فقلبك ماتوا
و تحن للبنت جارتكوا
والقعدة علي باب شقتكوا
لجل تشوفها طالعة السلم
و تحاول و بكل طريقة
ترميلها كام نظرة بريئة
تقنعها بانك حبيبها
و تقلد كل الاف لام
فتغني علي باب شقتها
و بيعمل عقلك قبل النوم
حاجة كده زي فلاش باك
و بياخدك لحاجات واحشاك
لعب الدومينو و الكوتشينة
و السرقة من اي جنية

و اول صلاة تراويح
و الفرحة بتعليق الزينة
تفتكر امك ساعة المصيف
لما تجيبك لعبة
كنت انت زمان نقتها
و تقعد تلعب بيها كثير
فتبوظ طبعاً زي اخواتها
بعد ما عقلك خلاك تشناق
فتجيب صورك و انت صغير
فتلاقي جواب لحبيبة قديمة
احساسك نحيتها اتغير
فبتضحك علي نفسك لما
كنت بتزعل علي شئ ضاع
اصلك لسة مكنتش تعرف
ان الانسان اصل لا بيع
فبتضحك و تنام مبسوط
تصحي وتقضي اليوم
وان عدي
فترجع في حاجات تعبك
فتحط دماغك فمخدة
و قبل النوم تلقي ف لاش باك